

## Henoko na Ujio wa Kristo wa Mara ya pili,

*Na Henoko, mtu wa saba baada ya Adamu, alitoa maneno ya unabii... akisema, Bwana alikuja na watakatifu wake maelfu kwa maelfu, ili afanye hukumu juu ya watu wote.*

**Yuda 14,15.**

**B**ustani nzuri na ya kupendeza ya Edeni, ambapo wazazi wetu wa kwanza walifukuzwa, iliachwa hadi pale Mungu alipoamua kuiangamiza dunia kwa gharika. Mungu aliipanda bustani hiyo na kuibariki kwa namna ya pekee, na kwa sababu ya majaaliwa Yake ya ajabu aliichukua kutoka duniani na atairejesha tena duniani ikiwa imepambwa kwa utukufu zaidi ya ule iliyokuwa nao wakati ilipoondolewa duniani. Mungu alikusudia kutunza sampuli ya kazi Yake kamilifu ya uumbaji mbali na laana ambayo kwayo Aliilaani dunia.

Mungu alifunua kikamilifu mpango wa ukombozi kwa Henoko na kwa Roho wa unabii akamchukua hadi kwa vizazi vitakavyoishi baada ya gharika na kumuonesha matukio makuu yanayohusiana na ujio wa Kristo mara ya pili na mwisho wa dunia (Yuda 14).

Henoko alifadhaishwa na suala la wafu. Ilionekana kwake kwamba watakatifu na waovu wote watakufa na huo ndio utakuwa mwisho wao. Hakuweza kuona dhahiri maisha ya watakatifu ng'ambo ya kaburi. Katika maono ya kinabii huu alielekezwa kuhusiana na Mwana wa Mungu, ambaye angekufa kama kafara ya mwanadamu, na alioneshwa ujio wa Kristo katika mawingu ya mbinguni, akiambatana na jeshi la malaika, kuwapa uhai watakatifu waliokufa na kuwakomboa kutoka katika makaburi yao. Aliona pia hali ya ulimwengu kuharibika katika wakati ambapo Kristo angeonekana mara ya pili – kwamba kungekuwepo majivuno, kiburi, kizazi chenye kujipenda nafsi wakijipanga kufanya uasi dhidi ya sheria ya Mungu na kumkana Bwana Mungu wa pekee na Bwana wetu Yesu Kristo na kuikanyaga damu Yake na kudharau upatanisho Wake. Aliwaona watakatifu wakiwa wamevikwa utukufu na heshima wakati waovu wakiondolewa machoni pa Bwana na kuteketezwa kwa moto...

Henoko aliendelea kukua kiroho wakati alipokuwa pamoja na Mungu. Uso wake uling'arishwa na mwanga mtakatifu ambao ulisalika usoni mwake wakati alipowafundisha wale watakaosikiliza maneno yake ya hekima. Mwonekano wake wa kimbingu uliotukuka uliwaogopesha watu. Bwana alimpenda Henoko kwa sababu alimfuata kwa uthabiti na kuchukua uovu na alikuwa na bidii katika kutafuta hekima ya kimbingu, ili kuyafanya mapenzi ya Bwana kwa ukamilifu. Alitamani sana kusogea karibu zaidi na Mungu, aliyemcha, aliyemheshimuu na kumwabudu. Mungu asingemruhusu Henoko kufa kama watu wengine, bali alituma malaika Zake ili wamchukue na kumpeleka mbinguni bila kuonja mauti. Mbele za wenye haki na waovu, Henoko alitwaliwa kutoka katikati yao. Wale waliompenda walidhani kuwa Mungu alimuacha katika sehemu fulani alipojitenga nao, lakini baada ya kumtafuta kwa bidii na kushindwa kumpata, walitoa taarifu kwamba hakuwepo kwa sababu Mungu alimchukua (**The Story of Redemption, 58, 59**).